

陳泥丸祖師---南宗四世祖 陳子石祖師

陳祖名楠。字南木。號翠虛。廣東惠州博羅縣白水巖人。以盤橈為業。俗無知者嘗作盤橈之偈曰。終日盤橈圓又圓。中間一位土為尊。磨來磨去知多少。個裏全無釜鑿痕。又籊桶曰。有漏較無漏。如何水泄通。既能圓密了。內外一真空。其造詣如此然。當時陳祖雖已悟性。仍復訪求金丹立命之術。誓以一身攬性命之全功。有志者事竟成。遂獲親授太乙刀圭火符秘訣。於薛道光祖。宋政和中任院錄事。後歸羅浮潛脩密鍊道成。法備驅狐治病。鞭龍救旱。浮笠濟流。含汞成金。顯諸靈異。不可殫述道成。壽百餘歲著有翠虛吟。紫庭經丹基歸一論。竝金丹歌訣行於世。

紀念陳泥丸祖師駢言

玄源至妙。出心裏而彌深。炁素且微。孕身中而浩大。經言性命。非在山川。書論陰陽。能超生死。從來聞道。必因有德之人。大抵成功。盡是虛心之士。命能栽接。眾人既渴望以窮求。旨得流芳。我輩且相承而詳解。文多譬喻。學有淵源。伏念陳泥丸祖師聖哲者。系自惠州。縣分博羅。盤橈技作。深明中土之為尊。錄事任為。了悟脩身之最樂。壽延逾百。學必異於尋常。醫治稀奇。才詎殊夫小術。詩訣百章須認子。丹基歸一可通神。紫庭經著。世鮮其才。赤縣天成。那知其妙。然而翠虛吟就。密授玉蟾。水調歌頭。纔酬九思。鵲橋仙賦。都緣遍訪知音。真珠簾吟。只為宏揚妙諦。羅浮寄隱。蓬島逍遙。相濟浮笠之流。點成含汞之金。於是悲懷難語。苦在雙脩。休管訕聲。惟存至法。標紫書還返樞要。吐盡心肺。刻丹經古今繁蕪。澄明耳目。挽邪行而莫止。啟正軌以真歸。宣道在天五地十以秘。彼此同宮。傳玄泄木精金髓之微。虎龍共穴。心同道祖。雲遊函谷之關。鉢紹純師。授與海南之子。三關三候。靄然入德之門。九劍九琴。煥若脩真之路。爰乃文以闢邪。理雖尋正。離宮性養。拋世業以求師。坎府神凝。契人緣而覓侶。三花指破。句無斧鑿之痕。二體分明。詞露甲鱗之述。潭飛皓月。法依顛倒之脩。天躍游魚。情闡相交之奧。以本直言脩種。紫陽之祖訓教人。疾往通都。道光之師說尋友。奚如軒后。居然有路於通宵。不類三峰。誤認生身於淫媾。此又瑣瑣長談。為從人而施己。綿綿一脈。復追祖而尋宗者矣。類之相似。言不勝提。遂將南木之玄音。播於世界。又紀呂祖之誕會。示在同人。此軒轅黃帝陰符有旨。明言害裏與恩中。而鍾離祖師正道破迷。分泌以示人。時維六月。刊編七期。闡分泌已示人。吾乎後矣。握玄光以援世。孰然共之。謂道可人傳。法真維護。盟天誓矣。始知無漏之方。立契行之。當識有為之作。闢鑪峰於島上。一旨潛脩。採金液於人中。二靈合煉。驚奇食母。釀成延命之醪。詫異淘金。拾卻長生之寶。則道史重光。獨崇中華之學。仙譚在望。定有新穎之風。言誠意會。理豈泥文。

陳泥丸祖師遺產(精神脩養要妙-7)

嫦娥已與斗牛歡。赤蛇蒼龍交合時。赤血換兮白血流。金翁姘女奪造化。潭底日紅北馬奔。胎仙只在交結成。金精只在坤宮藥。譬如夫婦交合時。一點精血結成嬰。彼之以情而感情。尚且嬰兒十月成。何況宇宙在乎手。身中虎嘯龍吟聲。雖然不見龍之吟。波浪高湧千萬尋。雖然不見虎之嘯。夜深風聲吼萬林。言語不通非眷屬。工夫不到不方圓。只取一味水中金。收拾虛無造化窟。軟似綿兮硬似鐵。此是南方赤鳳血。每常天地交合時。奪取陰陽造化機。玄關一竅無人知。此是刀圭甚奇絕。水火相交虎遇龍。金翁姘女兩爭雄。青去白來然後黑。到紅方且入黃宮。渴飲華池飢嚼炁。移將北斗向南辰。紅鉛之髓名真汞。黑汞之精是正鉛。父精母血結胎成。尚是他形似我形。身內認吾真父母。方纔捉的五行精。黃芽本是乾坤炁。先汞後鉛為大藥。此寶從來二八傳。曾取地天交泰事。兩處擒來共一鑪。只在當人一寸心。曲江之上鵲橋橫。交加二八為丹母。地戶閉時骨髓實。天關漸積自然開。鉛汞之宗龍虎根。玄牝之戶戊己門。二姓為親女唱歌。紅黑相將婦嫁夫。三姓包含二物交。片月橫空對鵲橋。龜蛇因甚兩相纏。翠娥獨立水晶宮。體態嬌嬈有意濃。半夜黃婆來叩戶。作媒嫁去與金翁。但取坎精點離穴。只向離無尋坎有。移卻南辰回北斗。一箭透三關。方表神仙手。兔子方來烏處住。龜兒便把蛇吞了。

陳祖丹論曰紅鉛黑汞即金精木液也別之為男女夫婦其實陰陽二字是皆一物也一陰一陽之謂道道即金丹也詔人煉七返九還金液大丹者是乃人道之捷徑矣至於神入炁為胎火煉藥成丹豈容易明



道學真宗陳泥丸祖師